

## Evening Dogri News

30 August 2024

### Headlines

- प्रधानमंत्री नरेंद्र मोदी होरें मुम्बई च 'ग्लोबल फिनटेक महोत्सव' च भारत दे फिनटेक कौशल गी दस्सेया। उनें आखेआ-फिनटेक क्षेत्र नै वित्तीय सेवाएं गी लोकतांत्रिक बनाने च महत्वै आहली भूमिका निभाई ऐ।
- उप-राष्ट्रपति जगदीप धनखड़ होरें आखेआ जे भारत उच्चर इक विकसित मुल्ख नेई बनी सकदा जिच्चर महिलां विकास च हिस्सेदारी नेई करडन।
- विदेश मंत्री सुब्रह्मण्यम जयशंकर होरें आखेआ-पाकिस्तान कन्नै हुन गल्लै-बातै दा समांस नेई रेया ऐ की जे हर कार्यवाही दे नतीजे होंदे न।
- सरकार नै E-HRMS पर एकल सैहल पेंशन-दरखास्ती फार्म ते भविक्ख दा डिजिटल एकीकरण जारी कीता ऐ।

<><><><><><>

### Mumbai-PM Fintech

प्रधानमंत्री नरेंद्र मोदी होरें आखेआ जे भारत दा फिनटेक दुनिया भरै दे लोकें दा जीवन सैहल बनाने लेई कम्म करा'रदा ऐ। मुम्बई च वैश्विक फिनटेक सम्मेलन-2024 गी संबोधित करदे होई प्रधानमंत्री होरें आखेआ जे भारत आस्सेया फिनटेक गी अपनाना रफ्तार ते मानदंडें दे स्हाबें दुनिया च बेजोड़ ऐ। दुनिया भरै दे तत्काल डिजिटल लेन-देन भारत च होआ रदे न। प्रधानमंत्री होरें आखेआ जे वित्तीय सेवाएं दे लोकवादीकरण च फिनटैक नै महत्वै आली भूमिका नभाई ऐ। उनें आखेआ जे डिजिटल तैन-देन कन्नै कन्नोकन्नी चला'रदी पैरेलल अर्थ बवस्था दी कवैथ खत्म करने ते बैंकिंग च मदाद थ्होई ऐ। प्रधानमंत्री होरें आखेआ जे भारत च फिनटेक कन्नै जेडे बदलाव आए न, ओह प्रौद्योगिकी तकर गे सीमित नेई ऐन। उनें आखेआ जे उनें बदलावें दा समाज पर पवा'रदा प्रभाव लम्में असें तकर असरदार रौहग। प्रधानमंत्री होरें मुम्बई च जीएसएफ नुमैश दा बी दौरा लाया जेदे च फिनटैक परिदृश्य दियां नमियां काड्डां दर्शाई गेदियां न। इस मौके पर रिजर्व बैंक दे गवर्नर शक्तिकांत दास होरें आखेआ जे भारत अजज बदलाव दे नेहू मुकाम पर ऐ जित्थें प्रौद्योगिकी हर नागरिक दिएं आसें-मेदें गी पूरा करने च अहं भूमिका निभागा। वैश्विक फिनटैक सम्मेलन 2024 दा आयोजन भारती भुगतान परिषद राष्ट्रीय भुगतान निगम ते फिनटैक समन्वय परिषद नै सांझे तौरा पर कीते दा ऐ। इस दौरान कांफ्रेंस च साड्डे

350 सत्र लाए जाडन जिंदे च भारत ते बदेशें दे कोई 800 वक्ता संबोधित करडन। वक्ताएं च नीति निर्माता, सीनियर बैंकर, उद्योगपति ते बुद्धिजीवी शामिल होडन।

<><><><><><>

### VP-Women

उपराष्ट्रपति जगदीप धनखड़ होरें आखेआ जे जेकर महिएं दी हिस्सेदारी नेई होग तां मुख्य विकसित मुख्य नेई बनी सकदा। दिल्ली युनिवर्सिटी दे भारती कालेज च विकसित भारत च महिलाएं दी शमूलियत विशे पर आयोजित इक सत्र गी संबोधित करा रदे हें धनखड़ होरें आखेआ जे विकसित भारत दे निर्माण च महिलाएं दी महत्वै आली भूमिका ऐ। उनें कोलकाता दुष्कर्म ते हत्या आली घटना पर दुख जाहिर करदे होई आखेआ जे जित्थे महिलाएं ते कुडियां सुरक्षित महसूस नेई करदियां ओहू समाज सभ्य समाज नेई ऐ। उनें आखेआ जे भारत इक परिपक्व ते औपचारिक अर्थ बवस्था बनने दी दिशा च तेजी कन्नै अगगे बदा रदा ऐ। उपराष्ट्रपति होरें आखेआ जे शौचालय युक्त घर, रसोई गैस कनेक्शन, नलके राएं पीने आला पानी जनेइयां बुनियादी सुविधाएं कन्नै लोके दे जीवन च सुधार होआ ऐ।

<><><><><><>

### CS-IT

मुख्य सचिव अटल डुल्लू होरें कल सेहत, जल शक्ति ते दुए विभागें दियां सेवां आम लोके तगर पजाने लेई शुरू कीती गेदिएं बक्ख-बक्ख सूचना प्रौद्योगिकी दखल अंदाजियें दा प्रत्यक्ष जायजा लैने लेई बक्ख-बक्ख हितधारके कन्नै लाई गेदी इक मीटिंग दी अध्यक्षता कीती। मीटिंग दौरान मुख्य सचिव होरें विभागें दे कम्में-काजें च होर बेहतरी आनने लेई तकनीकी सतह पर होर बेहतरी आनने दी गल्ल कीती। मुख्य सचिव होरें सलाह दिती जे हर विभाग गी एहू दिक्खना होग जे ओहू कियां हासल आधुनिक तकनीक दा इस्तेमाल करियै विभाग दे कम्में-काजें च बेहतरी आनी सकदे न।

<><><><><><>

## Flash Doda Candidates

डोडा दे जिला संवाददाता फियाज पाम्पोरी नै जानकारी दिती ऐ जे डोडा जिले दे त्रै विधानसभा हल्के लेई 27 मेदवार चुनां मैदान च रेई गए ना। कुल 41 मेदवारें डोडा पूर्व, भद्रवाह च 16 ते डोडा पच्छिम च 9 मेदवार चुनां मैदान च रेई गए ना। नामांकन पत्रें दी जांच मगरा 7 मेदवारें दे कागत पत्तर खारिज कीते गए जिसले कि 7 मेदवारें अपना नामांकन वापस परताई लैता ऐ।

<><><><><><>

## India-China LAC

भारत ते चीन नै बन्ने आले इलाकें च जमीनी स्तर पर शांति बनाई रखने दा फैसला कीता ऐ। दौनें देशें दोहराया ऐ जे असल कब्जा रेखा दा मान दक्खिया सरबंधें च सामान्य स्थिति दी बहाली लेई जरूरी ऐ। भारत-चीन बन्ने आले मामले पर सलाह-सूत्र ते आपसी तालमेल सरबंधी कार्य तंत्र दी 31मीं बैठक कल बीजिंग च आयोजित कीती गई। विदेश मंत्रालय मुजब दौनें पक्खें मतभेद घट्ट करने ते बकाया पेदे मामलें दा तौले शा तौले नबेड़ा करने लेई असल कब्जा रेखा दी स्थिति पर रचनात्मक गल्लकत्थ कीती।

<><><><><><>

## SVEEP-Jammu

औंदे विधानसभा चुनाएं दे मद्देनजर सरकारी एमएएम पी.जी कॉलेज जम्मू च मतदाताएं गी जागरूक करने ते उंदी शमूलियत गी बदाने दे मकसदक कन्नै इक जागरूकता प्रोग्राम दा सरिस्ता कीता गेआ। एहदा आयोजन स्वीप तैहत कीता गेआ।

<><><><><><>

## SVEEP-Reasi

बक्ख-बक्ख सरिस्ते ते कार्यक्रमें राएं लोकें गी मतदान बारे जागरूक बनाया जा'रदा ऐ। जागतें दे सरकारी हायर सेकेंडरी स्कूल रियासी च आयोजित कार्यक्रम च वक्ताएं अपने विचार रक्खे। एहदे अलावा मतदाताएं गी गाने राएं बी जागरूक बनाया गेआ।

<><><><><><>

## SVEEP-Udh.

स्वीप प्रोग्राम तैहत उधमपुर दे सरकारी हायर सेकेंडरी स्कूल चख् इक कार्यक्रम दा सरिस्ता कीता गेआ। एहदा आयोजन जिला चुनां अधिकारी सलोनी राय ते उप चुनां अधिकारी डॉ. अनिरुद्ध राय हुंदी दिक्ख-रिक्ख च होआ। इस मौके पर बोलदे होई उप चुनां अफसर डॉ. अनिरुद्ध राय होरें स्पीप गतिविधिएं दी जागरूकता फैलाने च महत्ता गी उजागर कीता।



## Jaishankar

विदेश मंत्री डॉ. जयशंकर होरें आखेआ ऐ जे हून पाकिस्तान कन्नै गल्लबात करने दा समां नेई रेया ऐ। अज्ज नमीं दिल्ली च इक कताबै दे विमोचन दे मौके पर विदेश मंत्री होरें आखेआ जे पाकिस्तान दे संदर्भ च भारत पूरी चाल्ली सौहगा ऐ ते नमीं दिल्ली च हर कार्यवाही दी प्रक्रिया देग, मगरा घटनाक्रम भामें खराब होवे भामें माढा। बांग्लादेश दे बारे च उनें आखेआ जे गोआंडी मुल्लै दे सियासी बदलावें दे चलदे भारत गी अपने हितें बल ध्यान देना होगा। मालद्वीप कन्नै भारत दे सरबंधें पर उनें आखेआ जे मालद्वीप गी लेइयै भारत दा दृष्टिकोण तोआर चढा रेया। अफगानिस्तान कन्नै भारत दे सरबंधें दा जिक्र करदे होई डाक्टर जयशंकर होरें आखेआ जे समाजी सतह पर लोके-लोके बश्कार सरबंध मजबूत न ते अफगान नीति दी समीक्षा मगरा भारत अपने हितें लेई सोहगा ऐ। उनें एहू बी आखेआ जे हर मुल्लै गी अपने गोआंडी मुल्लें कन्नै चुनौतिएं दा सामना करना पौंदा ऐ।



## Jitendra-Pensioners

पिंशनी होई चुके दे लोके आस्तै प्रक्रिया गी सौक्खा ते सरल बनाने दे इक उपा दे तौर पर सरकार नै एकल सरल पेंशन आवेदन पत्र जारी कीता ते भविक्खुआ पोर्टल दा e-HRMS दे कन्नै डिजिटल एकीकरण कीता। इनें जत्तें दी शुरूआत कार्मिक, लोक शकैत ते पेंशन सरबंधी मामलें दे राज्यमंत्री डॉ. जतिंद्र सिंह होरें नमीं दिल्ली च वीडियो कांफ्रेंसिंग दे राएं कीती। इस मौके पर बोलदे होई डॉ. जतिंद्र सिंह होरें आखेआ जे सरकार जीवन गी सरल ते सखल्ला बनाने आस्तै बचनबद्ध ऐ। उनें आखेआ जे e-HRMS दे कन्नै भविक्ख च डिजिटल एकीकरण कन्नै इनें लोके गी मदद थहोगा। कार्मिक ते सिखलाई सरबंधी मैहकमे दे सचिव विवेक जोशी होरें मानव संसाधन प्रबंधन गी बदाने आस्तै इनें उपाएं गी मील दा पत्थर दस्सेया। मैहकमे दे सचिव वी.

श्रीनिवास होरें आखेआ जे e-HRMS कन्नै भविक्ख दे एकीकरण कन्नै पेंशनभोगिणं आस्सेया पेंशन आवेदन दी असल समें पर ट्रैकिंग मुमकिन होई सकोग।

<><><><><><>

### First Time Voter

किशतवाड़ जिले थमां औंदे असेंबली चुनाएं च पैहली बारी अपने वोट पाने दे अधिकार दा इस्तेमाल करने आलियां दूर-दरेडे सरथल दियां बसनीक दऊ मतदाता नेही राथोर ते पायल परिहार वोट पाने लेई मतियां उत्साहित न।

<><><><><><>

### SVEEP-Poonch

पुंछ दे जिला चुनां प्रशासन आस्सेया मतदाताएं गी जागरूक करने लेई स्वीप तैहत कुड़िणं दे हायर सेकेंडरी स्कूल पुंछ च सिम्पोजियम ते जागरूकता शिविर दा सरिस्ता कीताग गेआ। एहदा मकसद प्रतिभागिणं गी मतदान दी महत्ता बारै दस्सना ते मतदान प्रक्रिया बारै जानकार बनाना हा।

<><><><><><>

### DEO-Samba

साम्बा दे जिला चुनां अधिकारी राजेश शर्मा होरें स्वीप तैहत डीसी दफ्तर परिसर दे मैदान च इक जागरूकता कार्यक्रम दा सरिस्ता कीता जेदे च मतदाताएं आस्सेया सगंध चुक्की गेई। औंदे विधानसभा चुनाएं दे मद्देनजर जिला प्रशासन पुरजोर कोशिश करा रदा ऐ। मतदाताएं गी जागरूक करने दी ते मतदाता बी चुनाएं गी लेइए बडे मते उत्सुक न।

<><><><><><>

### IMD

मौसम विभाग नै अगले 2 थवां त्रै दिनें च ओडिशा तटीय आंध्र प्रदेश, छत्तीसगढ़, विदर्भ ते तेलंगाना च भारी बरखा होने दी पेशनगोई कीती ऐ। कल्लै तगर गुजरात ते विदर्भ दे किश हिस्सें च बी बरखा होई सकदी ऐ। इस दौरान मौसम विभाग नै आखेआ ऐ जे अगले 2 थवां त्रै दिनें दौरान उत्तर पूर्व भारत, उप हिमालयाई पच्छिम बंगाल ते अंडमान निकोबार द्वीप समूह च भारी बरखा होने दी संभावना जताई ऐ। दक्खन ते मध्य भारत च कोंकरण, गोवा, केरल ते

तटीय कर्नाटक दे कन्नोकन्नी अगले 7 दिनें दौरान तमिलनाडू पुदुचेरी, लक्ष्यद्वीप ते मध्य महाराष्ट्र च बी ऐसी गै स्थिति रौहगा। जिसले के उत्तर पच्छम भारत च जम्मू-कश्मीर ते लद्दाख दे किश हिस्सें च भारी बरखा होई सकदी ऐ। हफ्ते दौरान दिल्ली-एनसीआर, उत्तर प्रदेश, हरियाणा, पंजाब ते पच्छम राजस्थान च हल्की थ्वां दरम्याने दर्जे दी बरखा दी संभावना ऐ।

<><><><><><>